



蜀中著作記卷之六

地理志部

山海經十八卷

吳越春秋曰禹南巡登南岳得金簡玉字通水之理遂行四瀆所至使益疏而記之名山海經

地理指掌圖一卷

陳氏曰蜀人稅安禮撰元符中欲上之朝未及而卒書肆所刊皆不著名書亦頗闕不備此蜀本有涪右任慥序言之頗詳



畏天畏人
心法積善
積善名家



閩中曹學佺能始者

輿地圖十六卷

陳氏曰金華王象之撰輿地紀勝逐州為圖逐路為卷其搜求亦勤至四蜀諸郡尤詳其兄觀之漕夔門時所得也眉山李說齋季允為之序

蜀紀

隋經籍志云漢楊雄撰載蠶叢以前洪荒之事下迄西漢有本紀有傳常璩李膺多引用之

蜀都賦

亦雄撰北齊司馬膺之註今無全篇僅存者菀文類聚所載一段耳

蜀記

後漢廣漢李尤伯仁撰太平御覽引之

鄉俗記

後漢漢中趙甯撰華陽國志蜀守陳留高朕續文翁之後雅播文教太尉趙公瑤初為九卿適子甯還蜀朕命為文學撰鄉俗記

三巴記 巴中異物志

並蜀漢譙周撰水經注寰宇記多引用之

本蜀論

蜀漢光祿大夫來敏撰郾道元注水經引之

陳術益部耆舊傳

蜀志術字申伯漢中人博學多聞位歷三太守又著釋問七篇○臨邛鄭廔伯邑亦作者耆舊傳

陳壽益部耆舊傳十篇

干獻之與人書益部耆舊傳今送想催驅寫取了慎不可過淹留○常覽益部耆舊作梁益篇又作後賢傳華陽國志十二卷

晉常璩撰自序曰巴蜀厥初開國載在書籍或因文緯或見史記久遠隱沒寔多踈略及周之世侯伯擅威雖與牧野之師希同盟要之會而秦資其富用兼

入下漢祖階之奄有四海梁益及晉分益為寧司馬相如莊君平揚子雲陽成子玄鄭伯邑尹彭城譙常侍任給事等各集傳記以作本紀略舉其隅其次聖稱賢仁人志士言為世範行為表則者名挂史錄而陳君承祚別為耆舊始漢及魏煥乎可觀然三州土地不復悉載地理志頗言山水歷代傳久郡縣分建地名改易於以居然辨物知方猶未詳備于時漢晉方隆官司星列提封圖簿歲集司空故人君學士蔭高堂翳帷幙足綜物土不必待本紀矣曩遭厄運函夏滔堙李氏據蜀兵連戰結三州傾墜生民殲盡府

庭化為狐狸之窟城郭蔚為熊羆之窟宅遊雉鹿田
棲虎豹平原鮮麥黍之苗千里茂雞狗之響丘城蕪
邑莫有名者嗟乎三州近為荒裔桑梓之域曠為長
野反側惟之心若焚灼懼益遐棄城隍靡聞廼考諸
舊紀先宿所傳并南裔志驗以漢書取其近是及自
所聞以著斯篇又采公孫述蜀書及咸熙以來喪亂
之事約取耆舊士女英彥肇自開闢終乎永和三年
凡十篇號曰華陽國志夫書契有五善達道義章法
戒通古今表功勲而後旌賢能恨據才短少無遠及
不早援翰執素廣訪博咨流離困瘵方資腐帛於顛

墻之下求餘光於灰塵之中刪滅者多故有所闕猶
愈於遺忘焉蜀紀言三皇乘祗車出谷口秦宓曰今
之斜谷也及武王伐紂蜀亦從行史記周貞王之十
六年秦厲公城南鄭此谷道之通久矣而說者以為
蜀王因石牛始通不然也本紀既以炳明而世俗間
擴有為蜀傳者言蜀王蠶叢之間周迴三千歲又公
荆人鼈靈死屍化西土後為蜀帝周葺弘之血變成
碧珠杜宇之魄化為子鵲又言蜀椎髻左衽未知書
文翁始知書學按書紀帝居房心決事參伐參伐則
蜀分野言蜀在帝議政之方帝不議政則王氣流於

西故周失紀綱而蜀先王七國皆王蜀又稱帝此則
蠶叢自王杜宇自帝皆周之叔世安得三千歲且太
素資始有生必死死終物也自古以來未聞死者能
更生當世或遇有之則為怪異予所不言况能為帝
王乎碧珠出不一處地之相距動數千里一人之血
豈能致此鵲鳥今云是雋或曰雋周四海有之何必
在蜀昔唐帝萬國時雍虞舜光宅八表大禹功齊九
州后稷封殖天下井田之制庠序之教由來遠矣孔
子曰述而不作信而好古竊比於我老彭則彭祖本
生蜀為殷太史夫人為國史作為聖則僂自上世見

稱在昔及周之末服事于秦首為郡縣雖濱戎夷亦
有冠冕故蜀紀曰大人之鄉方大之國也至于漢興
及當荒服而無書學乎漢書郡國之有文學因文翁
始若然翁以前齊魯當無文學哉漢末時漢中祝元
靈性滑稽用州牧劉焉談調之末與蜀士燕胥聊著
翰墨當時以為極歡後人有以為惑恐此之類必起
于元靈之由也惟智者辨其不然幸也綜其理數或
以為西土嶮固襟帶易守世亂先違道治後服若吳
楚然故逋逃必萃奸雄鬪覲蓋帝王者統天理物必
居土中德膺命運非可資能恃險以干常亂紀雖饕

竊名號終於絕宗殄祀何者天命不可以詐詭而邀神器不可以僥倖而取也是以四岳三塗陽城太室九州之險而不一姓冀之北土馬之所產古無興國夫恃險憑危不階曆數而能傳國垂世所未有也故公孫劉氏以敗於前而諸李踵之覆亡於後天人之際存亡之術可以為永鑒也干運犯曆破家喪國可以為京觀也今齊之國志貫之一揆同見不臣所以防狂狡杜奸萌以崇春秋敗絕之道也而顯賢能著治亂亦以為獎勸也

晉孫盛蜀世譜

裴松之註三國志引之

巴蜀志

晉袁休明撰其略云高山嵯峨巖石磊落傾側縈迴下臨峭壑行者攀緣牽援帶索全書不傳此數語見酈道元水經注亦碎金殘璧也

傅玄蜀都賦

玄字休奕北地泥陽人博學善屬文舉秀才晉武受禪以玄為諫官遷侍中司隸校尉卒追封清泉侯所著蜀都賦初學記多採之

左思蜀都賦

思字太冲作三都賦載筆自隨十年乃就蜀其一也
其事物多得之張載載父收為蜀郡太守隨之任所
作有劍閣銘及成都白菟樓詩

補闕蜀都賦

王逸少與周益州書云省疏具悉彼土山川之奇故
知揚雄左太冲蜀都賦為不備宋蒼溪嚴大猷因之
作補闕蜀都賦

辨蜀都賦

宋王騰著序略云予讀左思蜀都賦見其薄蜀陋吳
諂魏以諛晉之君臣苟售一時之聲價而滅天下之

忠義甚矣原思之詞似欲尊正統而黜偏方然不顧
正氣之淪溺乃知蜀之被枉其所由來者豈朝夕哉
故作辨蜀都賦以申蜀人之憤氣其商略土風採撫
人物不該治亂興衰之變邪正是非之理者不在鋪
列之限

益州記二卷

梁太僕卿涪城李膺公輔撰時為本州別駕樂史寰
宇記常引用之按公輔一作公胤先是譙周任豫劉
欣期各有益州記散見類書

段氏遊蜀記錦里新聞三卷

俱唐段成式著見寰宇記及宋史經籍志

唐鄭昀蜀記二卷

陳振孫曰雜記蜀事人物古跡寺觀之屬人代未詳按蜀志補罅以昀為成都人復著有天寶西幸略云元澄蜀記一卷

出宋史新編未詳人代

唐盧求成都記五卷

序曰蜀國自秦始通秦遣蜀王五美女蜀亦遣五丁迎之到梓潼見一大蛇入山穴中一人掣其尾不能得五人相助大呼拽之山崩五丁及秦女皆死惠王

遂遣張儀司馬錯從石牛道滅蜀因封公子通為蜀侯以陳莊為相置巴蜀郡遷秦人萬家實之民始能秦言以蜀令張若為太守前時蜀王開明尚納美女為妃蓋五都山之精也及死塋于城西北遣五丁擔其本山之土以為塚今有二石尚存古老言五丁擔土擔也陳莊既為秦公子相數年遂謀反殺秦公子秦伐蜀誅莊封子惲為蜀侯惲後母誣惲有罪賜劔自殺蜀人以其冤因為立祠又封子綰為蜀侯後復疑綰反誅死自此但置守而已後以李冰為蜀守冰始鑿三江引水以行舟楫岷山多梓栢大竹坐致材

木又溉水稻田於是沃野千里號為陸海復置綿洛
二水用便溉灌作石犀五以厭毒蛟命曰犀牛後更
為耕牛二又作三石人立水中冰非常人也與江神
約曰水竭不致足盛不沒有大鑿巖崖通沫水導江
之龍大怒冰乃持刀入水與龍鬪龍死遂無水害迄
今蒙利蜀人稱郫繁為膏腴綿洛為浸沃云昭襄王
時又有白虎為患意廩君之魂也歷四郡傷千二百
人王乃募能殺之者邑萬家金帛稱是巴夷胸忍廖
中藥何謝作白的弩於高樓瞰而射之死王嫌其夷
人乃刻石復頃田不租十妻不數傷人不論殺人

死與之盟曰秦人犯夷輸黃龍一覆夷人犯秦償清
酒一鍾其人安之遂號白虎夷其族又有濮賓賓充
武勇居渝水夾水以居為漢高祖前鋒陷陣善舞巴
與蜀代為仇讎蜀嘗封弟葭萌於漢中號苴侯命其
邑曰葭萌至漢高六年始分置廣漢郡高后城樊道
開青衣文帝末以廬江文翁為郡守穿煎油口溉田
千七百頃立文學選吏子弟皆就學令俊乂之士張
叔等十八人東詣博士受七經還以教授於是岷絡
之地學比齊魯孝景帝嘉歎遣天下郡國皆立文學
自文翁始也文翁明天文灾異後以博士徵至侍中

揚州刺史孝武帝置四部都尉俾立十八郭於是郡縣多城觀矣又分牂柯置益州是為南益州宣帝地節三年穿臨邛蒲鹽井二十置鹽鐵官自漢興至哀平牧守仁賢宣德立教英偉命代之士其出如林璽書束帛交馳於梁益之地矣雖魯之洙泗齊之稷下未足多也且漢徵八士蜀預其四高帝分蜀郡北鄙置廣漢武帝分南鄙為犍為遂有三蜀之號王莽改郡守為帥正以蜀郡為導江公孫述為帥正治臨邛述僭號後漢先武帝滅述還為蜀郡順帝即位復為益州郡名依舊州治大城郡治少城靈帝末以劉焉

為牧及卒子璋偽嗣建安十九年璋迎漢左將軍劉備至遂滅璋稱帝繼漢號稱先主治成都魏末司馬昭平蜀復為益州晉受魏禪以州領郡武帝末以成都為國封子穎為其王後賈人李雄僭稱王晉穆帝永和初遣桓溫滅之復為蜀郡譙縱反安帝命朱齡石討平之至梁分益州更置南北二益州以武陵王紀為刺史紀僭帝號領兵東下為湘東王所殺後魏廢帝前二年尉遲迥定益州置總管後迥舉義旗不受代為隋主堅所戮按史迥無舉義旗事恐是隋文帝若據益州不受代則王謙也隋開皇元年廢總管置行臺以蜀王秀為西南道行

臺尚書令三年復爲總管大業元年廢總管爲州又
改州爲郡聖唐武德元年復爲總管三年置行臺改
爲益州以太尉秦王爲益州道行臺總管又改爲大
都督府天后析益州置彭蜀漢三州開元二年始以
齊景冑爲劔南節度營田兼姚嵩等州處置兵馬使
自此始有節度使也八年以李濟爲使去兵馬以章
仇兼瓊兼山南西道採訪使其後或兼或否亦無定
制上元二年始分東西川廣德二年復合爲一大曆
二年又分兩川至今不改天寶三載復爲大都督府
十四載玄宗皇帝巡幸車駕留五月至德二年改爲

成都府置尹比東西二京號南京後復停大凡今之
推名鎮爲天下第一者曰揚益以揚益爲首蓋聲勢
也人物繁盛悉皆土著江山之秀羅錦之麗管絃歌
舞之多伎巧百工之富其人勇且讓其地腴以善熟
較其要妙揚不足以侔其半况亦府畿縣與秦洛並
故非上將賢相殊勲重德望實爲人所歸服者則不
得居此况控帶蠻落阨戎限羗非文武寬猛包羅法
度之君子則不能得中庸以是聖庭慎擇尤難其任
凡使號有三節度觀察安撫先時南蠻六部不相臣
服天子有恩賞各頒一詔呼六詔開元末節度使王

豈受賄上奏合六爲一乃封大首帥越國公蒙歸義
爲雲南王始獨稱南詔至楊國忠遙領蜀郡太守兼
採訪使遂擾邊閩希立功伐乃有瀘南不利之變貞
元中常令公臯爲節帥招復雲南背蕃歸漢十一月
八日置使安撫兼統押西山八國逾界羗蠻等使是
爲三使常令公本以奇勲秉旄戢思立邊効又在鎮
且歲久南詔爲其用拓地甚遠公既卒劉闢繼公後
以兵守險爲不順誅死家籍沒後京兆杜公爲節帥
酷易軍政殊不以封域爲念成卒罔代邊蠻積忿至
太和三年十二月蒙嶮巔遂以兵剽掠至城下杜公

填門不敢與爭會監軍使矯詔宣諭蠻人遂退工巧
散失良民殲殄其耗半矣列政補完尚不克稱大中
六年四月詔以丞相太原公有駁制羗戎之成績由
邠寧節度司徒同平章事鎮蜀蜀爲奧壤領州十四
縣十一戶百萬兵士五萬外壘接兩蕃人性勁勇易
化以道難誣以智公至以儉約帥之以謹廉不伐臨
之以刑賞法制平治之人歡且舞旦夕詠公之德矣
先是西蜀圖經甚備朝野之士多寄聲寫錄主茲務
者不勝其煩遂盡削而潛焚之長吏至即據顯者集
爲一軸以獻繇是百不書一大中八年戶曹參軍蘭

蜀中著作 卷之六
弘宗甚好學且目覩司徒相國之異績願付以傳示
于後然不以文自任剪截踈長蕪言不畧相國乃厲
于小子令刊益之且曰不以淹徐疾速歸於流布以
爲不朽之事求受命震怖又不欲以圖經爲目乃搜
訪編簡目爲成都記五卷經與圖附益之願終弘宗
之職庶以此爲助也大中九年八月五日敕

續成都記一卷

五代杜光庭著見宋史經籍志

錦里耆舊傳

五代進士張彭著見人物志

續錦里耆舊傳

陳振孫曰前應靈縣令平陽句延慶昌裔撰開寶二
年秘書丞劉蔚知榮州得此傳其詞蕪穢請延慶修
之改曰成都理亂記天成後別加編次起咸通九載
迄乾德乙丑平蜀之後朝廷命令官僚姓名及政事
因革以至李順王均劉旰作亂之迹皆畧載之知新
繁縣太常博士張約序按延慶成都人

蜀程記一卷

五代常莊著見宋史

華陽記

偽蜀廣政中荷澤院僧仁顯撰古今集記取之

蜀江志十卷 劔南風物錄二十八種

並宋東陽沈立撰慶曆間知洪雅縣事

離峯志十卷

見新編不知作者

梁益志十卷

晁公武曰任弁撰天禧中弁游宦于成都以蜀記數家言皆無據乃引書傳刊正其謬自為序

蜀古今傳

陵州志云宋續耆來守是州暇日作蜀古今傳趙清

獻公成都古今集記寔撫用之

成都古今集記三十卷

晁氏曰趙抃編抃自慶曆至熙寧凡四入蜀知蜀事為詳撫其故實以類相從分百餘門時熙寧七年也自序曰僕繇慶曆至今四入蜀凡蜀中利害情偽風俗好惡瞭然見之不疑嘗謂前世之士編撫記述不失於踈略則失於漫漶不失於鄙近則失於舛雜嚮治平末因取續耆舊傳而脩正之去年陳和叔翰林以書見貽俾僕著古集今別為一書此固僕之夙心而未有以自發也繇此參訪舊老周咨碩生緝以事

類成三十卷不始乎蠶叢而始乎牧誓之庸蜀從經也從經則蠶叢不必書而書之于後何也揚雄紀之吾棄之不可也參取之而已矣事或至於數說何也久論之難詳也昔者齊太公仕於周司馬遷有三說馬疑以傳疑可也神恠死生之事不可以爲教書之何也吾將以待天下之窮理者也書亂臣所以戒小人書寇盜所以警出沒書蠻夷所以盡制禦之本末終之以伐蜀使萬世之下知蜀之終不可以苟竊也其間一事一物皆酌考衆書釐正譌謬然後落筆如關羽墓今荷聖寺闢然有榜而僧仁顯作華陽記云

墓在草場廟在荷聖此目擊之所當棄而從之者也若夫知之有未至編之有未及則亦一人之功不可以求備然竊意十得八九矣後之君子其亦有照於斯乎

范百祿序曰成都蜀之都會厥土沃腴厥民阜繁百物浩麗見謂天府縑縷之賦數路取贍勢嚴望偉卓越佗郡朝廷席五聖之厚基萬齡之泰明燭外遐愛均畿輔凡選建師長必一時名德中外皆曰可然後以尹茲土其優馭西南之意槩古邈矣非獨隆於今也蜀之所以爲重於天下雖窮隅鳩舌共知之而其

可以文載而又者則往志踳錯近事缺絕殆不足以彰其重熙寧壬子八月詔以叅知政事趙公爲資正殿大學士再蒞此府蜀之黔黎夙云易擾小異故常必厯上心是時天子方惻然矜之故不憚委公以遠公倍道而來下車之初釐所當恤亟即民心平紛解累人乃說懌盡知明天子覆育遠方之意甚厚公亦自謂宜於蜀也會翰林學士陳公和叔寓之書曰蜀事可觀惜其墜落泯泯不耀公慨然留意每政事閒隙延多學博識之士與之講求故實掇採舊聞若耳目所及叅諸長老攷覆是非自開國權輿分野占象州部號名因革之別其鎮其浸岡聯派屬之詳都城邑郭神祠佛廟府寺宮室學宮樓觀苑囿池沼建創之目門閭巷市道里亭館方面形勢至於神仙隱逸枝藝術數先賢遺宅碑版名氏事物種種瓌譎竒詭織畫畢書繇秦漢已來凡爲守令學學有風迹者若干人有唐迄今知府事居多閱碩端毅之望又若干人其行事暴於圖史不可勝述其始至若代去之年月序次昭然著矣厥生鉅人千古不乏澤我文化雋乂迭起科選德進相踵于朝數百年間無一遺者物有其善雖毫釐云補實足以爲一方盛觀自昔僭賊

乘民凶菑事變不同久近亦異悉其致寇之由及王師夷難底平之迹與夫歷世蠻獠叛服不常中國所以驅除羈縻得失之故又足以爲不虞不若之明鑒嗚乎既有政以孚其惠又爲書以憲厥後公之於蜀可謂志得而道備矣書成凡若干篇以類相從爲三十卷名曰成都古今集記令觀之者信蜀爲重於天下非虛也哉

續成都古今集記二十二卷

陳氏曰知府事王剛中居正撰紹興三十年余嘗手寫洛陽名園記而題其後曰晉王右軍聞成都府有

漢時講堂秦時城池門屋樓觀慨然遠想欲一遊日其與周益州帖蓋數致意焉近時呂太史有感於宗少文卧遊之語凡昔人紀載入境之勝錄爲一編其奉祠毫社也自以爲譙沛真源恍然在目而充之太極嵩之崇福華之雲臺皆將卧遊焉噫嘻弧矢四方之志高人達士之懷古今一也顧南北分裂蜀在境內雖遠患不往爾往則至矣毫交嵩華視蜀猶邇封也欲往其可得乎然則太史之情其可悲也已余近得此記手寫一通與東京記長安河南志夢華錄諸書並藏而時自覽焉是亦卧遊之意云耳于時歲在

已丑蜀故無恙也後七年而有虜禍秦漢故迹焚蕩
無遺今其可見者惟此二記耳而板本亦不可復得
矣嗚呼悲夫自昔清獻公剛取張彭句延慶鄭晞盧
求周封等書為成都古今集記三十卷凡興廢遷徙
及城郭官府坊市庫廐儒宮佛室仙館神祠陵墓渠
堰樓臺池苑之名數與風俗之好惡人物之臧否方
伯監司之至去蠻夷寇盜之起城木石之殊尤蟲魚
之變恠靡不畢載其采獲貫穿亦動且詳矣自熙寧
訖今凡八十七年事當紀述者蓋難遽數而舊記莫
或踵繼見聞異辭日月寢久恐遂湮滅可不惜哉晉

陵胡承公嘗命僚屬論次未究端緒尋遷宣撫使事
復中輟余來此將周歲蒙國威憲邊堠幸帖息斯民
亦安堵如故因以閒隙搜訪纂緝作續記二十二卷
前記載古事往往有差誤則辨正之脫遺則補足之
清獻所云知之有未至編之有未及者余固不免也
其亦有待於後之君子乎

成都古今丙記十卷

宋淳熙制置知府范成大撰自序曰前記趙清獻公
作於熙寧七年甲寅凡三十卷蜀之始封及分野梁
益州劔南西川成都府屬郡縣得名之所自廢置因

華之不同攷之詳矣後八十七年當紹興三十年庚辰王恭簡公續爲之記有辨其差誤附益其未載者二記今皆具存續記之成距今纔十有八年雖事之當書者不至甚夥然恐自是日月寢久來者難考乃蒐耳目所及者繼書之名曰丙記其二記已載者皆不重出云

成都古今丁記二十五卷

淳熙中制置胡元質長文撰自序曰成都古今記起自熙寧甲寅前帥趙閱道集之凡三十卷後八十七年當紹興庚辰王時亨復爲續記二十二卷廢置因

革纖悉巨細靡不載也又十有八年當淳熙丁酉范至能復爲丙記十卷距時亨日未遠雖不至如前續記之多然二書之所不及者則加詳矣予以是年秋代匱帥蜀四路兵民之寄寔在焉蜀又困於征輸權酷之額雖減鹽茗之課猶重其他邊防民政事所當行利興害去皆有端緒可覆而考也居三年綴爲丁記二十五卷粗成一書惟沈黎番部繹騷踰時方定變之所起以迄無事隨宜措畫本末具存姑俟論定別爲一編合成都四記而觀之往事頓前得過半矣

蜀人物志

寶謨閣學士劉甲撰甲字師文淳熙進士嘉州人

劔南廣記四十卷

宋龍州助教郭友直撰

宋成都志

慶元中制置使建安袁說友序作者未知爲誰按費著云全蜀郡志唯成都志有文類今文類五十卷爲袁所集則志必出其手而自序矣

元成都志

至正中費著撰自序曰成都居全蜀上游其名稱自西漢始按禹貢蜀爲梁州之分岷山導江東別爲沱

今導江與沱名縣鎮於成都此三代而上地志之見于書而不可誣者文王之化行乎江漢之域江有沱詠於二南之先然漢統於江以朝宗沱附於江以起興江首四瀆歷代祠其神於成都故成都爲江之源而荆揚之江特其委爾考禹迹聲教之所被稽文王美化之所行徵諸武王逖矣西土之誓言論全蜀而泝源於成都上游之導江則孰有逾於詩書之爲可信而有據者哉謂三代而下秦惠伐蜀而後得與中國通文翁興學於成都而後得與齊魯比不端木於夫子剛定之經惟遷史之言是信亦學者之過也若

曰周衰而諸侯叛蜀據阻自安職貢廢而文教弛秦
惠伐之而後道路通文翁學而後風化復斯可矣捨
詩書斷自秦漢以論蜀則未可也全蜀郡志無慮數
十家惟成都志有文類兵餘版燬莫存蜀憲官佐搜
訪百至得一二寫本廼參稽訂正僅就編帙凡郡邑
沿革與夫人物風俗亦槩可考焉遂鳩工鋟梓以廣
其傳若文類之詳則有待於後之好事者

青城山甲記一卷

晁氏曰偽蜀道士杜光庭賓聖撰集蜀水若山在青
城者悉本道家之言

青城山乙記一卷

范仲立撰

岷山異事三卷

宋史句台符撰

永康軍志今灌縣

教授張增編

茂州圖經

郡守史憲序

資中志今資縣

扈自中編李折序

金淵志今金堂縣

郡守韓植序

龍門志今龍安府

楊燾序

龍門續志

宋之源序

陰平縣記今青川所

唐大中六年周茵撰

嘉州志二卷

本志序云宋呂勤爲守命張開修我眉志至呂昌朝

以嘉州圖經增廣之爲嘉州志二卷

嘉定志

郭公益編

續志

林潔已編

我眉志三卷

晁氏曰張開撰郡守呂勤命開考圖經及傳記石刻
綴緝成書析爲十四門宋白吳中復詩文附于後

我眉山記一卷

宋史新編此記次在盧鴻下

榮州圖經今榮縣

隆興元年李燾為守命教官勾演編

武陽志十卷今彭山縣

陳氏曰乾道六年教授葛元騭著太守廖遲元達序

武陽志二十七卷

何友諒著見宋經籍志

眉州古志

孫汝聽編

通義志二十五卷今眉州

宋經籍志趙善顛著

通義記

家安國編

江鄉志亦眉州

張伯虞編劉光祖序

臨邛志二十卷補遺十卷今邛州

宇文紹奕撰見經籍志

雅安志今雅州

李嗣文序

沉黎志二十三卷今黎州

宋史王寅孫撰

戎州記今敘州府

唐書李仁實撰頓立人官至左史

敘州圖經三十卷

俞聞中撰見宋史

瀘州地里書

蒲江高載著載為瀘州錄事參軍州守吏部范君委

修筆削用許為時所重

江陽志今瀘州

教授李濟序

江陽譜

永嘉曹叔遠編

江州圖經一卷今重慶府

見新編不載作者

江州事迹三卷

宋史經籍志韓昱撰

南平志今南川縣

郡守趙彥邁序

南平郡圖經一卷

失作人名見新編

涪陵記一卷今涪州

宋史云馮忠恕撰

古涪志十七卷

宋經籍志云王寬夫撰

龜陵志今涪州

楊興序

龜陵新志

鄭鑑撰

忠州圖經一卷

新編載失名

南賓志今忠州

樊漢炳序

平都山仙觀記二卷今鄧都縣

見宋經籍志未詳人代

墊江志三十卷今合州

郡守任逢編見宋史

靖南志今榮昌縣

太守黎伯巽序

珍州圖經三卷今遵義府真安州

見宋經籍志失名

夔州圖經

蜀中著作 卷之六
故相國安陽公源乾曜參軍時修

夔舊圖經

李國緯編

夔州圖經四卷

宋經籍志劉德禮撰

夔州志十三卷

新編云馬導撰

通川志十五卷今達州

宋史馬景修著

大寧監圖經六卷

宋史云不知作者

南浦志今萬縣

趙善贛編

萬州新志亦萬縣

王子申序

梁山軍圖經今梁山縣

教授黃震仲編

閬苑新記三十卷今保寧府

新編載王震撰

隆苑記亦保寧府

宋陟文

閩苑前記

何求文

閩苑續記

曹無忌文保寧志云宋閩中何求以宋陟隆苑記疎略乃裒次三十卷為閩苑記其後同縣曹無忌又續為二十六卷其書自元符三年起修至紹興二十五年止

寧武志今廣元縣

鄒卿序楊炎正編

清化前志今巴州

教授劉甲編

清化續志

教授李鈞編

果州圖經五卷今順慶府

見宋史無作者名

開漢志亦順慶府

郡守朱繁序云紀將軍信加封詔詞有云實開漢業故建樓命名曰開漢郡志名編亦曰開漢廣安志

嘉定改元郡守廖唐英序

宕渠志二卷亦廣安州

無編集人姓名及郡守題名仙釋詩文等類

蓬州志五卷

秘書少監劔門羅疇疇老撰凡十五門崇寧四年序

梓潼古今記今潼川州

淳熙間郵令孫汝聽作

梓潼風俗譜

元祐間教授石慶嗣作

新潼川志

劉甲序

潼川府圖經十一卷

宋史新編袁觀撰

遂寧志

馬崇文序

普慈志三十卷今安岳縣

宋郡守楊泰之撰青神人

西南夷事狀二十卷 西戎記二卷

並唐常臯撰

西南備邊錄十三卷

陳氏曰唐宰相李德裕文饒太和中鎮蜀所作錄內州縣城鎮兵食之數及畧具焉

李巽岩曰今存者只一卷與崇文總目相符豈嘉祐以前已亡逸乎德裕之深謀遠慮雖至今可用也而所存止此可惜

西南備邊志十二卷

陳氏曰嘉定進士鄧嘉猷撰紹興末犍爲有蠻擾邊初莫知其何種族也已而有能別識其爲虛恨蠻者時蜀邊久無事既去而朝廷憂之詔有司經度嘉猷取秦漢以來訖于本朝凡史傳所載蠻事皆著于篇

時乾道中也其爲志九爲圖一

邊和錄五卷

陳氏曰承議郎河東陳伯彊撰載胡世將承公宣撫川陝事

西南條著

趙瞻著瞻知威州以威茂襍羣獠險而難守不若合之而建郡于汶川條著其詳爲書後熙寧中經理西南就瞻取其書考焉

益部方物畧記

宋端明殿學士吏部侍郎知益州安陸宋祁子京撰

序曰益為西南一都會左阻劔門右負夷番內坦夷數百里環以長江裹以複岑川陸盛氣礙而不得東迴薄蜿蜒還負一方為珍木為恠草為鳥魚芋稻之饒日暘雨雨噓和吐妍層出雜見不可勝狀殆峨精縕靈示完富瓌瑋於茲壤也嘉祐建元之明年予來領州得東陽沈立所錄劔南方物二十八種按名索實尚未之盡故遍詢西人又益數十物列而圖之物為之贊圖視狀贊言生之所以然更名益部方物畧記凡東方所無及有而自異皆取之異禪風土聚丘之遺云

三川官下記二卷

宋敏求撰見宋史經籍志

續東京至益州地里圖若干卷

宋史李常著常字公擇東坡友也

峽程記一卷

五代常莊撰見宋史

峽山履平集一卷

司馬儼撰見宋經籍志

峽山利涉集一卷

潘子韶著見宋史

蜀北路秦程記一卷

宋史陳延禧撰

吳船錄一卷

范成大至能撰公自蜀帥東歸紀遊取門泊東吳萬里船之句為名

蜀中著作記卷之七

閩中曹學佺能始著

集部

蜀國文英八卷

王蜀嘉州司馬劉贊編見宋經籍志

成都文類五十卷

宋慶元中制置使建安袁說友編其自序曰天地之祕藏發而為名山大川山川之秀靈歛而為文章華藻二者相為頡頏而光明焉者也兩京三都之賦摹寫天地繪繡山川絢道德揆天庭潤金石諧韶濩與

乾坤造化周流盛大於宇宙之間千百世而下知有
兩京三都者以此文也然則天地山川而可無此文
哉而可以不傳此文哉益故大都會也有江山之雄
有文物之盛竒觀絕景僊游神跡一草一木一丘一
壑名公才士騷人墨客窺竒上芳聲流文暢散落人
間何可一二數也凡此者予來三年亦既略睹矣或
曰兩京三都以賦而傳使無傳焉斯文泯矣然則繇
漢以來其文以益而作者今獨無傳可乎有益都斯
有此文此文傳益都亦傳矣爰屬寮士撫諸方策哀
諸碑識流傳之所膾炙友生之所見聞大篇雄章英

詞綺語折法度極炫耀其以益而文者悉登載而彙
輯焉斷自漢以下迄於淳熙其文篇凡一千有竒類
爲卜目登爲五十卷益之文於茲備矣嗟乎後世
之士豈無浮沅湘由巴蜀作史記如司馬子長者乎
豈無上瞿唐過夔梓賦雪錦如杜少陵者乎又豈無
自西蜀歷荆楚棲遲山水間如田游巖者乎儻復得
如二三公者而訪斯益墜斯文焉則知清寧闔關至
大至廣之內而有所謂蜀蜀六十州亘五千里之內
而有所謂益益都無量江漢炳靈之內而有所謂文
者其不在此書乎是書也而有傳焉庶幾乎無負於

益矣

固陵集二十卷

宋廣都費士幾達可著嘉定中爲夔守編集管內山川建置碑文記頌爲二十卷多半夔門之書在旁縣者十之二三

成都古今詩集六卷

章棻編人代未詳出宋史經籍志

嘉定詩

王象之輿地碑目云岑參爲嘉州時編

漢司馬相如集二卷

後人取其上林賦難蜀父老文及封禪頌諸作編輯爲上下卷今刻在漢魏叢書

文心雕龍曰相如含筆而腐毫上林繁類以成艷又云相如之難蜀父老文曉而喻博有移檄之骨焉又云相如封禪蔚爲倡首爾其表權輿序帝王炳玄符鏡鴻業駢前古於當今之下騰休明於列聖之上歌之以禎瑞贊之以介丘絕筆茲文固維新之作也

王子淵集

王褒字子淵資中人漢書益州刺史王褒使褒作中和樂職詩以宣風化因薦之於朝詔徵褒獻聖主得

賢臣頌宣帝嘉之令待詔備歌頌數從行幸受賜為多褒嘗作洞簫頌元帝為太子時令後宮貴人皆誦讀之又徵時客前上戲為僮約一篇劉勰云王褒髯奴券之楷也

揚子雲集五卷 別傳一卷

晁氏曰古無雄集宋譚愈好雄文患其散在篇籍離而不屬因綴繹之得四十餘篇又云從父詹事公以道雜取諸書所載雄逸事為一編系之以贊文心雕龍曰子雲屬意辭人最深觀其涯度幽遠搜選瑰麗而竭才以鑽思故能理贍而辭堅矣

反離騷一章

漢書雄每作賦嘗擬司馬相如以為式又怪屈原文過相如至不容作離騷自投江而死迺作書往往撫離騷文而反之自崕山投諸江流以弔屈原名曰反離騷又旁離騷作重一篇名曰廣騷又旁惜誦以下至懷沙一卷名曰畔牢愁畔牢愁廣騷文多不載獨載反離騷

二十四箴一卷

雕龍云子雲稽古始範虞箴晁氏曰今廣德所刊本校集中無司空尚書博士太常四箴集中所有皆據

古文苑而此四箴或云崔駰或云崔瑗疑不能明
演連珠一卷

雕龍云楊雄覃思文潤業深綜述碎文瓌語肇為連
珠其事雖小而明潤矣

漢何汶集

汶郚縣人何英之孫也集有世務三十篇

李伯仁集二卷

李充字伯仁廣漢雒人也少以文章顯漢和帝時侍
中賈逵薦充有相如楊雄之風召詣東觀受詔作賦
并蘭臺令史安帝時稍遷為諫議大夫受詔與謁者

僕射劉珍等同撰漢記後帝廢太子為濟陰王充上
書諫爭順帝立遷樂安相年八十三卒所著詩賦銘
誄頌七歎哀典凡二十八篇充同郡李勝亦有文才
為東觀郎著詩誄頌論數十篇

文章流別云李充自山河都邑至於刀筆管契莫不
有銘

李密述理論十篇

晉書密字令伯犍為武陽人治春秋左氏傳博覽多
所通涉皇甫士安雅善之

玄鳥賦

密長子賜少能屬文作玄鳥賦舉秀才為汶山太守
龔壯邁德論

晉書壯字子偉巴西人繁已自守與鄉人譙秀齊名
以父叔為李特所害終身不至成都惟研考經典覃
思文章每歎中夏多經學而巴蜀鄙陋兼遭李氏之
難無復學徒乃著邁德論文多不載

何安文集十卷

隋書安字栖鳳郫縣人傳稱又著孝經義疏二卷

陳子昂文集十卷

別傳曰子昂字伯玉梓州射洪人始以豪家子馳俠

使氣至年十七八未知書嘗從博徒入鄉學慨然立
志因謝絕門客專精墳典數年之間經史百家罔不
該覽尤善屬文雅有相如子雲風骨年二十一以進
士對策高第文明初上書帝覽而異之勅曰梓州人
陳子昂地籍英靈文稱偉曄可麟臺正字時洛中傳
寫其書市肆閭巷吟諷相屬乃至轉相貨鬻飛馳遠
邇拜右拾遺卒年四十二其文章散落多得之於人
口今所存者十卷嘗著江上文人論將磅礴化機而
與造物者遊遭家難亡之故人范陽盧藏用集其遺
文為序傳識

柳宗元撰楊評事文集後序略云文有二道辭令褒貶本乎著述者也導揚諷諭本乎比興者也著述者流出於書之謨訓易之象系春秋之筆削其要在於高壯廣厚詞正而理備謂宜藏於簡冊也比興者流蓋出於虞夏之詠歌殷周之風雅其要在於麗則清越言暢而意美謂宜流於誣誦也茲二者考其旨義乖離不合故秉筆之士恒偏勝獨得而罕有兼者焉厥有能而專美命之曰藝成雖古文雅之盛世不能並肩而生唐興以來稱是選而不忤者其梓州陳拾遺乎

閻丘均集

均成都人唐初與杜_預奮言齊名為安樂公主所薦起家太常博士公主被誅均坐貶循州司戶卒其孫閻丘師與杜甫通家來往

李義府集三十卷

唐書義府本瀛州饒陽人其祖為射洪縣丞因家於永泰今之鹽亭也嘗獻承華箴見文部

李翰林集二十卷一云草堂集

晁氏曰李白集舊十卷唐李陽冰序咸平中樂史別得白歌詩十卷凡七百七十六篇又纂雜著為別集

十卷宋次道治平中得王文献及唐魏萬所纂白詩
又裒唐類詩洎石刻所傳者通陽水樂史集共一千
一篇雜著六十五篇曾子固乃考其先後而次第之
云白蜀人天寶初至長安明皇召為翰林供奉頃之
不合去安祿山反明皇在蜀永王璘節度東南白時
卧廬山迫致璘敗坐繫潯陽獄崔渙宋若思驗治白
以為罪薄釋白因使謀其軍乾元元年終以璘事長
流夜郎遇赦得釋過當塗以卒始終更涉如此此白
之詩所自序可考者也舊史稱白山東人為翰林待
詔又稱白在宣城謁見永王璘遂辟為從事而新書
又稱白流夜郎還潯陽坐事下獄宋若思釋之者皆
不合於白之自序蓋史誤耳予按杜甫詩亦以白為
山東人而蘇子瞻嘗恨白集為庸俗所亂則白之自
序亦未可盡信而遂以為史誤近蜀本又附入左綿
邑人所裒白隱處少年所作詩六十篇充為淺俗白
天才英麗其辭逸蕩雋偉飄然有超世之心非常人
所及讀者自可別其真偽也

唐宣州當塗令李陽水序云李白字太白隴西成紀
人梁武昭王暠九世孫蟬聯珪組世為顯著中葉非
罪謫居條支易姓與名然自窮蟬至舜五世為庶累

世不大耀亦可歎焉神龍初始逃歸於蜀之彰明復
指李樹而生伯陽驚姜之夕長庚入夢故生而名白
以太白字之世稱太白之精得之矣不讀非聖之書
恥為鄭衛之作故其言似天仙之辭凡所著述言多
諷喻自三代以來風騷之後馳驅屈宋鞭撻揚馬千
載獨步唯公一人故王公趨風列岳結軌羣賢翕習
如鳥歸鳳盧黃門云陳拾遺橫制頽波天下質文翕
然一變而今朝詩體尚有梁陳宮掖之風至公大變
掃地併盡今古文集遏而不行唯公文章橫被六合
可謂力敵造化歟天寶中明皇下詔徵就金馬降輦

言迎如見綺皓坐七寶牀御手調羹以飲之謂曰卿
是布衣名為朕知非素蓄道義何以及此置於金鑾
殿出入翰林中問以國政潛草詔誥人無知者醜正
同列害能成誇格言不入帝用踈之公乃浪跡縱酒
以自昏穢詠訶之際屢稱東山人與賀知章崔宗之
等號為八仙時又稱公為謫仙朝列賦謫仙之詞凡
數百首多言公之不得意天子知其不可留乃賜金
歸之遂就陳留採訪使彥允請北海高天師授道籙
於齊州紫極宮將東歸蓬萊訪羽人駕丹丘耳陽冰
試絃歌於當塗心非所好公遐不我棄乘扁舟而相

顧臨當桂冠公又疾亟草藁萬卷手集未修枕上授
簡俾令為序論關雎之義始愧卜商明春秋之詞終
慚杜預自中原有事公避地八年當時著述十喪八
九今所存者皆得之他人焉時寶應元年十一月乙
酉也

前進士魏顥序云自盤古劃天地天地之氣良於西
南劔門上斷橫江下絕岷峨之曲別為錦川蜀之人
無聞則已聞則傑出是生相如君平王褒揚雄降有
陳子昂李白皆五百年矣白本隴西缺放形因家於
綿身既生蜀則江山之英秀也伏羲造書契後文章

濫觴者六經糟粕離騷糠粃建安七子七子至白中
有蘭芳情理宛約詞句研麗白與古人爭長三字九
言鬼出神入盪若乎後耳白父居峨眉與丹丘子因
持盈法師達白亦因之入翰林名動京師大鵬賦詩
家藏一本故賓客賀公竒白風骨呼為謫仙子由是
朝士作歌數百篇上皇豫游召白白時為貴門邀飲
比至半醉令製出師詔不草而成許中書舍人以張
垆讒逐游海岱間年五十餘尚無祿位祿位拘常人
橫海鷗負天鵬豈池籠榮之顥始名萬次名炎萬之
日不遠命駕江東訪白游天台還廣陵見之眸子炯

然哆如餓虎或時束帶風流醞藉曾授道籙於齊有
青綺冠帔一副少任俠手刃數人與友自荆徂揚路
亡權窆迴棹方暑亡友糜潰白泐其骨江路而舟又
長揖韓荊州延飲白誤拜韓讓之白曰酒以成禮荆
州大悅白始娶於許生一女一男男曰明月奴女既
嫁而卒又合於劉劉訣次合於魯一婦人生子曰頗
黎終娶於宋門携昭陽金陵之妓迹類謝康樂世號
為李東山駿馬美妾所適二千石郊迎飲數斗醉則
奴丹砂撫青海波滿堂不樂白宰酒則樂顯平生自
負人或為狂白相見泯合有贈之作謂余爾後必著

大名於天下無忘老夫與明月奴因盡出其文命顯
為集顯今登第豈符言耶解携明年四海大盜宗室
有某者白陷馬謫居夜郎罪不至此屢經昭洗朝廷
忍白久為長沙汨羅之傳路遠不存否極則泰白宜
自寬吾觀白之文義有濟代命然千鈞之弩魏王大
瓠用之有時議者柰何以白有叔夜之短儻黃祖過
禰晉帝罪阮古無其賢所謂仲尼不假蓋於子夏也
經亂離白章句蕩盡上元末顯於絳偶然得之沉吟
累年一字不下今日懷舊援筆成序首以贈顯作顯
酬白詩不忘故人也次以大鵬賦古樂府諸篇積新

而錄文有差互者兩舉之白未絕筆吾其再刊付男
平津子掌其他事跡存於後序

李太白藁書跋云藁書世傳李太白遺文或謂謝氏
子弟誑武功蘇才元所書更不復詳考所出而推與
過重便謂不減魯公然此書雖少繩墨不可考以法
度要是軒前輕後度越陵突令人想見酒酣賦詩時
也王僧虔論書或以其人可想或以其法可存世人
愛李太白名至偽書一卷亦聲價增重豈以其人可
想故耶

朱巨川集

唐朱灣字巨川西蜀人貞元元和間為府從事高仲
武間氣集云朱君率履貞素放情江湖郡國交徵潛
耀不起有唐高人也詩體清逸興用宏深因詞寓意
放詠充工

符載集十卷

唐符載字厚之岐襄人幼有宏達之志隱居廬山聚
書萬卷不為章句學貞元中李巽江西觀察薦其才
授奉禮郎為南昌軍副使繼辟西川常臯掌書記歷
監察御史元和中卒段文昌為墓志附於後集皆雜
文末篇數詩而已集前有崔羣王湘送符處士歸覲

序皆云載蜀人以比司馬王揚云

雍陶集十卷

陶字國鈞成都人太和中進士為簡州刺史有詩名見詩話

李遠集一卷

唐建州刺史雲陽李遠求古撰太和五年進士終御史中丞有集傳

唐求集一卷

唐嘉州處士唐求與顧非熊齊名詳見詩話

孫光憲鞏湖編玩三卷

荆臺集四十卷 筆傭

集十卷

光憲字孟文陵州人王衍降唐避地荆南高從誨辟掌書記三世皆在幕府歸宋授黃州刺史在郡有聲乾德中卒光憲博通經史聚書數千卷或自抄寫攷攷讎校去而不廢好著撰自號葆光子所著荆臺集鞏湖編玩筆傭集橘齋集北夢瑣言蠶書又撰續通歷紀事頗失實太平興國初詔毀之

阜江漁翁集

後唐張立著立新津人少博學尤長詩什隱居山谷中孟蜀明德間詔赴闕立詐病不就先是知祥入蜀

中外騷動明宗頗以蜀人為疑凡有勢力貨產之族悉遣入洛立嘗為詩諷曰朝廷不用憂巴蜀稱霸何曾是蜀人宰相李昊聞而重之復薦於昶亦托病不就
就有詩數百篇號阜江漁翁集行世後徙居雙流唐英商英皆其孫也

梓潼集二十卷

五代李堯夫著詳見詩話

玉壘集十卷

唐僧可朋著丹稜人

煙花集五卷

蜀後主王衍集豔詩二百篇且為之序

三家宮詞三卷

唐王建蜀花藥夫人宋丞相王珪三人所著

花藥夫人詩一卷

青城費氏女詳見詩話

蜀中著作記卷之八

閩中曹學佺能始著

集部

鮮于伯圭集一卷

宋鮮于懷字伯圭閩中人累舉不第嘗作樞愁詞時人稱之李宗諤贈詩云漢殿無人薦揚子滿朝空誦樞愁詞後與宗諤同年第四人登科趙普判秦州辟為觀察推官卒

民上編一十九卷

陳充字若虛成都人雍熙中甲科仕至刑部郎中知

貢舉卒詞學典贍性曠達喜談謔澹於榮利自號中庸子民士云者蓋其未仕已仕前後所著文也唐牛僧儒著善惡無餘論言堯舜伯鯀俱不能慶殃其子充因作論以反之

朱台符文集三十卷

宋史台符字拱正眉山人十歲能屬辭常作黃山樓記為當時所稱太宗廷試以尺畧成一賦登進士甲科好學喜延譽後進景德初為陝西轉運與時不合再出知洪州卒年四十二

五龍山居詩

謝全長江人居五龍山下以詩自娛其詩平澹有浪仙之風司馬池知小溪縣與之定交太平興國五年進士

田表聖咸平集五十卷 三朝奏議五卷

田錫字表聖其先京兆人唐末徙于蜀宋初與胡旦何士宗齊名興國三年進士第知制誥終有諫議大夫范仲淹司馬光讀其書皆稱其直諒蘇軾以之比賈誼云

牟君華文集

牟袞字君華安岳人受學於多岳先生端拱間登進

士第以文章名累官翰林學士有詩文行於世

東觀集十卷

華陽羅處約思純著知吳縣時王元之禹偁亦知長洲日與唱和蘇杭間多傳誦之淳化中受詔荆湖路巡撫欲以苛察立名所奏劾甚衆卒年三十三無後禹偁與蘇易簡收其文

漁舟集一卷

成都處士郭震希聲撰自稱汾陽山人李昉序稱其所作有孟郊風致淳化四年忽作詩曰朝出東門遊東門好春色青青原上草莫放征馬食詣闕獻書言

蜀利病未幾順賊已作矣

王岳集一卷

陳氏曰岳集中有春日感懷上滕白郎中盖亦宋初人又有聖駕親征河東及甲午避寇全家欲下荆南之語則是李順亂蜀之歲岳盖蜀人也耶

李建中集三十卷

建中字得中其先京兆人祖稠仕於蜀遂為蜀人興國中進士甲科累官主客員外郎性簡靜風神雅秀恬於榮利前後三求掌西京留司御史臺愛洛中風土就構園池號曰靜居好吟詠每遊山水多留題自

稱巖夫民伯善脩養預校定道藏卒建中善書札行
筆尤工多構新體草隸篆籀八分亦妙人多摹習嘗
手寫郭忠恕汗簡集以獻皆科斗文字詔嘉獎之

玉堂集二十卷

蘇易簡著易簡字太簡銅山人弱冠舉進士太平興
國五年狀元官翰林承旨太宗書玉堂之署賜之故
以名其集終叅知政事

文房四寶五卷

文選類要三卷

易簡撰集古今筆硯紙墨四門繼以賦頌述作有徐
鉉序又摘文選雙字以類編集為類要三卷

翰林續志二卷

禁林宴會集三卷

淳化編勅

三十卷

晁氏曰蘇易簡在北門最承太宗睽遇錄元和以後
至國朝翰林故事以續李肇之書太宗賜詩嘉之

翰林雜志一卷

其書不題撰人輯唐韋執誼故事元稹承旨壁記韋
采微新樓記杜元穎監院使記鄭璘視草亭記并李
宗諤題名記為一篇或云易簡子耆采其父翰林續
志所遺附益之

滄浪集十五卷

蘇舜欽撰舜欽字子美易簡之孫杜祁公衍之壻也
景祐中進士累遷集賢校理監進奏院坐用故紙錢
會客除名慷慨有大志好古工文章及廢居蘇州買
水石作滄浪亭益讀書發其憤懣於歌詩其體豪放
往往驚人又善草書醉酣落筆爭為人所傳翫
舜欽報韓維書曰蒙開責以兄弟在京師不以義相
就獨羈外數千里自取愁苦予豈無親戚之情豈不
知會合之樂也安肯舍安逸而甘愁苦哉昨在京師
不敢犯人顏色不敢論議時事隨衆上下心志蟠屈
不開固亦極矣不幸適在嫌疑之地不能決然早自

引去致不測之禍粹去下吏人無敢言友讎一波共
起謗議被廢之後喧然未已更欲寘之死地然後為
快來者往往鉤牘言語欲以傳播好意相恤者幾希
矣故閉戶不敢與相見如避兵寇偷俗如此安可久
居其間遂超然遠舉羈泊於江湖之上不惟衣食之
累實亦少避機穽也况血屬之多資入之薄持國見
之矣常相團聚可乏衣食乎不可也可閉關常不與
人接乎不可也與人接必與之言與之言必與之還
往使人人皆如持國則可不迨持國者必加釀惡言
宣布上下使僕不能自明則前日之事未為重也都

無此事亦終日勞苦應接之不服寒暑奔走塵土泥
淖中不能了八事羸馬餓僕日栖栖取辱于都城使
人指背譏笑哀憫亦何顏面安得不謂之愁苦哉此
雖與兄弟親戚相遠而伏臘稍足居室稍寬無終日
應接奔走之勞耳目清曠不設機關以待人心安閒
而體舒放三商而眠高春而起靜院明窓之下羅列
圖史琴樽以自愉悅有興則泛小舟出盤閭二門吟
嘯覽古於江山之間渚茶野釀足以銷憂尊鱸稻蟹
足以適口又多高僧隱君子佛廟勝絕家有園林珍
花奇石曲池高臺魚鳥留連不覺日暮昔孔子作春

秋而夷吳又曰吾欲居九夷觀今之風俗樂善好事
知予守道好學皆欣然願來過從不以罪人相遇雖
孔子復生是亦必欲居此也以彼此較之孰為然哉
人生內有自得外有所適固亦樂矣何必高位厚祿
役人以自奉養然後為樂今雖僑此亦如仕宦南北
安可與親戚常相守耶予窘迫勢不得如持國意必
使我尸轉溝洫肉餒虎而後以為安所義何其忍耶
詩曰凡今之人莫如兄弟兄弟以恩急難必相拯救
後章曰喪亂既平既安且寧雖有兄弟不如友生謂
友朋尚義安寧之時以禮義相琢磨予以持國外兄

弟也急難不相救又於未安寧之際欲以義相琢磨
雖古人所不能受予欲不報慮淺吾持國也按舜欽
以父任補太廟齋郎調滎陽縣尉王清昭應宮災舜
欽年二十一詣登聞鼓院上疏范仲淹薦其才召試
為集賢校理監進奏院所論議多侵權貴而其婦翁
杜衍與富弼在政府多引用一時聞人欲更張庶事
御史中丞王拱辰等不便其所為會進奏院祠神舜
欽與右班殿直劉異輒用鬻故紙公錢召妓樂閒宴
會賓客拱辰廉得之諷其屬劾奏因欲搖動衍事下
開封府劾治於是舜卿與異俱坐自盜除名舜欽既

廢寓吳中其友人韓維責以隔絕親交故報書云
歐陽氏序曰斯文金玉也棄擲埋沒冀土不能銷蝕
其見遺於一時必有收而寶之于後世者雖其埋沒
而未出其精氣光恠已能常自發見而物亦不能揜
也故方其擯斥摧挫流離窮厄之時文章已自行於
天下雖其怨家讎人及嘗出力而擠之死者至其文
章則不能少毀而揜蔽之也凡人之情忽近而貴遠
子美屈於今世猶若此其伸於後世宜何如也公其
可無恨予嘗考前世文章政理之盛衰獨惟唐太宗
致治幾乎三王之盛而文章不能革五代之餘習後

百有餘年韓李之徒出然後元和之文始復于古唐
衰兵亂又百餘年而聖宋興天下一定晏然無事又
幾百年而古文始盛于今自古治時少而亂時多幸
時治矣文章或不能純粹或遲久而不相及何其難
之若是歟豈非難得其人歟苟一有其人又幸而及
出于治世世其可不為之貴重而愛惜之歟嗟吾子
美以一酒食之過至廢為民而流落以死此其可以
歎息流涕而為當世仁人君子之職位宜與國家樂
育賢才者惜也子美之齒少予而予學古文反在其
後天聖之間予舉進士于有司見時學者務以言語

聲偶擿裂號為時文以相誇尚而子美獨與其兄才
翁及穆參軍伯長作為古歌詩雜文時人頗共非笑
之而子美不顧也其後天子患時文之弊下詔書諷
勉學者以近古由是其風漸息而學者稍趨古焉獨
子美為於舉士不為之時其始終自守不牽世俗趨
舍可謂特立之士也子美官至大理評事集賢校理
而廢後為湖州長史以卒享年四十有一其狀貌竒
偉望之昂然而即之溫然久而愈可愛慕其才雖高
而人亦不甚嫉忌其擊而去之者意不在子美也

才翁集一卷

蘇舜元字才翁銅山人子美兄也有氣節能詩尤工草書所著有才翁集

張少愚白雲集三十卷

張俞字少愚幼通悟於書無不該貫朝廷嘗以校書郎召表乞授其父隱於峽山之白雲溪凡六被徵召皆不起為之
漢風嘗賦洛陽懷古蘇子美見而嘆曰優游感諷意不可盡吾不能也

陳文惠公愚丘集三十卷

陳堯佐字希元閬州人端拱初進士歷官太子太師致政年八十二卒號知餘子謚文惠堯佐屬辭尚古

不牽世用言為二韻詩詞調雋永又有湖陽野廬遣興等集皆自有序

本傳文惠少好學及貴讀書不輟善古隸八分尤工詩

金龜集十五卷

文惠從子漸著漸與父堯封同廷試漸中第辭不就願權其父許之自號金龜子

澗上文人詩二十卷

陳恬叔易著堯叟裔孫也博學有高志不從選舉躬耕陽翟與鮮于綽崔鷗齊名號陽城三士別號澗上

文人詩句豪健其苦離別詩記靖康亂離之事傳誦于時

隱書三卷 學古詩五十篇

華陽梁鼎凝正著端拱進士獻聖德徽號頌萬餘言遷殿中丞歷知數州磊落有氣節好學工篆籀

任玠詩集

玠成都人通五經緯候音律琴奕丹青皆得其妙真宗令試學士院玠撰詩一千二百首以進賜進士授汝州團練推官玠具野服捧告身詣登聞鼓院納還西歸

書臺集三卷

南隆處士朱有字大有自稱雲臺山人天禧中王晦叔守蜀以古風六十言遺之書臺者其所居坊名也郭長孺歌詩雜文十卷

長孺不知何許人遷徙入蜀遂為成都人氣體夷粹遇人無貴賤磬折下之然其中挺拔不倚終日劇談無雜嫚戲語生平惟好書丹鉛點勘不去手自經史百氏浮屠黃老陰陽地理醫卜吐納煅煉之術皆研精其妙有易解十卷書解七卷道德經解三卷蔬食譜一卷又有孝行高逸等圖各為之論述

何通夫遺稿

何羣字通夫西充人嗜古學喜激揚議論雖業進士非其好也入太學與人言未嘗下意曲從同舍目為白衣御史上書言後世以文辭取士害道者莫甚於賦請罷去不聽乃慟哭取其平生所為賦八百餘篇焚之絀太學而卒趙抃在蜀奏羣遺藁有益時政宜表章之不聽

竹軒集

浚州龍昌期起之著祥符中韓魏公使蜀奏授試國子四門助教慶曆中文潞公奏授校書郎府學講說經義為太子洗馬致仕起之著書甚富以羽翼先儒汲引後學為己任時多譽之嘉祐中詔取其書昌期時年八十餘野服詣京師賜緋魚絹百疋歐陽公言其異端害道不當推獎奪所賜服罷歸卒

按福州守陳絳嘗延昌期入閩為衆講易得錢十萬而歸絳由此坐罪遂自成都械昌期至後守永康胡則子正為之破械出俸錢代償館以賓禮昌期所著書時有詭誕穿鑿之說詆斥周公此所以得罪也

虛舟子集

李定著郫縣人好古力學志不願仕養二親以孝聞

累舉孝廉不就以詩酒為樂自號虛舟子蜀中游值
兵火經籍不完天禧中詔訪天下書籍定率先投牒
監中羣書多出其家

于至詩文

于至登大中祥符五年徐夔榜進士及第七歲能屬
文十七遊京師上書二十餘萬言是時文章襲五代
餘風至自立機軸嘗作蓬萊宮賦寇萊公丁晉公皆
重之有詩文行世小溪人

陳公弼文集十卷

青神陳希亮著公弼其字也幼孤好學其兄使治息

錢希亮悉召逋家焚券使去天聖中舉進士以才幹
剛直名卒官京東轉運使卽李常之父

彭秘書文集 墨客揮犀十卷

宋史彭乘字利建華陽人進士及第歷秘書丞集賢
校理累遷翰林學士質重寡言聚書萬餘卷皆手自
刊校蜀中所傳書多出於乘晚歲歷典贊命而文詞
少工云

梅諫議詩集 奏疏四十篇

新繁梅贄公儀著贄進士起家慶曆中為御史嘗論
張堯佐緣宮掖以進恐上累聖德仁宗稱其言事有

體性淳靜不為矯勵之行平居未嘗問生業喜為詩多警句

廬江文集二十卷 刀筆五卷 奏議二十卷

何郊著郊字聖從成都人仁廟朝為御史擢天章閣待制熙寧中以尚書右丞致仕天資好學殆廢寢食為詩章簡重淳淡有孟東野之風其仕臺諫知無不言頗有直聲鮮于子駿志其墓集有李邦直序

華陽集一百卷 岐公宮詞一卷

王珪字禹玉其先成都人右補闕永之子也故號華陽後居開封少好學日誦數千言及長博通羣書慶

曆二年廷試第二嘉祐初入翰林文章閎麗自成一家朝廷大典冊多出其手後拜相封岐國公卒年六十七謚文恭

迂遺集十三卷

安仁計用章著用章年十八登天禧進士第五人孫有功登慶曆進士著唐詩紀事行于世

孫文懿集三十卷

孫抃字夢得眉山人六世祖長孺喜藏書以樓貯之蜀人號書樓孫家抃之從兄闢復於東山構屋三百楹號山學延成都何維翰為掌教以聚四方學者有

公養之法范鎮石揚休蒲師孟皆執經其中闢卒門人私謚曰儒心先生柝天聖中進士累官叅知

蘇明允嘉祐集十五卷

蘇洵字明允眉山人至和中國陽永叔得其書二十二篇大愛之以為賈誼劉向不過也以書獻除校書郎與姚子張同編太常因革禮百卷書方成而卒陳氏曰洵初入京師益帥張文定薦之歐陽公世皆知之而有雷簡夫者為雅州以書薦之張歐及簡夫公尤力張之知洵由簡夫世罕知之也簡夫書文亦慷慨偉麗可喜

蘇文忠集四十卷

後集二十卷

內制十卷

外制三卷

軾字子瞻洵之長子也生十年其母授以書聞古今成敗輒能語其要比冠學通經史屬文日數千言嘉祐中歐陽公知貢舉欲以冠多士疑曾子固所為乃寘之第二後以書謝永叔見之語客曰老夫當避此人放出一頭地又以直言薦之荅策入上等英宗在藩邸聞其名欲以唐故事召入翰林宰相不可知湖州言者摘其謝表中語以為謗逮赴御史臺子瞻當王安石紛更之際見其事不便於民則賦詩以諷之

故言者從而擠陷欲寘之死神宗薄其過責置黃州
溫公相哲宗累擢中書舍人除翰林學士承旨紹聖
中坐草責呂惠卿制安置惠州徙昌化元符初北還
卒于常州初軾好賈誼陸贄書論古今治亂不為空
言既謫黃州杜門深居馳騁翰墨其文一變平生遇
事所為詩騷銘記書札論議率皆過人晚喜陶淵明
詩和之幾徧為人英辯奇偉於書無所不通所作文
章才落筆四海已皆傳誦下至閭閻田里外至夷狄
莫不知名門下賓客亦皆一世豪傑其盛古今所未
有也立朝知無不言世稱其忠義嘗自比范滂孔融

東坡別集四十六卷

議者不以為過在黃州日自號東坡居士世因不呼
其名止目之為東坡云
陳氏曰坡之曾孫給事嶠季貞刊家集于建安大略
與杭本同蓋杭本當坡公無恙時已行於世矣麻沙
書坊又有大全集兼載志林雜說之類亦雜以賴濱
及小坡之文且間有訛偽勦入者有張某為吉州取
建安本所遺盡刊之而不加考訂中載應詔策論蓋
建安本無應詔集也

東坡儋耳手澤三卷 艾子一卷

陳氏曰今俗本大金集中所謂志林者也艾子相傳為東坡作亦未必然按艾子蜀中和羹之物字與毅同書名艾子取悅口云爾坡又有物類相感志十八卷

東坡詞二卷

黃山谷曰東坡居士曲世所見者幾百首或謂於音律小不諧然其辭橫放傑出自是曲子內縛不住者後山詩話曰東坡以詩為詞如教坊搗木使舞雖極天下之工要非本色

東坡奏議十卷

陸游跋曰天下自有公論非愛憎異同所能奪也如東坡之論時事豈獨天下服其忠高其辯使荆公見之其有不撫几太息者乎東坡自黃州歸見荆公於半山劇談累日不厭至約卜鄰以老馬公論之不可揜如此而紹聖諸人乃遂其伎心投之嶺海必死之地何哉

馬臺詩話十三卷 東坡詩話二卷

陳氏曰蜀人朋九萬錄東坡下御史獄公案附以初舉發章疏及謫官後表章書啓詩詞等又好事者集公雜書及詩為東坡詩話

註東坡詩四十二卷 年譜目錄各一卷

司諫吳興施元之德初與吳郡顧景蕃共為之元之子宿且為年譜以傳於世

陸游序曰近世蜀人任淵嘗註宋子京黃魯直陳無已三家詩頗稱詳贍若東坡先生之詩則援據閎博指趣深遠淵獨不敢為之說游頃與范公至能會於蜀因相與論東坡詩慨然謂予足下當作一書發明東坡之意以遺學者游謝不能他日又言之因舉二三事以質之曰五畝漸成終老計九重新掃舊巢痕遙知叔孫子已致魯諸生當若為解至能曰東坡竄

黃州自度不復收用故曰新掃舊巢痕建中初復召元祐諸人故曰已致魯諸生恐不過如此耳游曰此游之所以不敢承命也昔祖宗以三館養士儲將相材及官制行罷三館而東坡蓋嘗直史館者自謫為散官削去史館之職久矣至是史館亦廢故云新掃舊巢痕其用字之嚴如此而鳳巢西隔九重門則又李義山詩也建中初韓曾二相得政盡收用元祐人其不召者亦補大藩惟東坡兄弟猶領宮祠此句蓋寓所謂不能致者二人意深語緩尤未易窺測至如車中有布乎指當時用事者則猶近而易見白首沉

下吏綠衣有公言乃以侍妾朝雲嘗歎黃師是仕不
進故此句之意戲言其上僭則非得於故老殆不可
知必皆知此然後無憾至能亦太息曰如此誠難矣
後二十五年游告老居山陰澤中吳興施宿武子
出其先人司諫公所註數十大編屬游作序司諫公
以絕識博士名天下且用工深歷歲久又助之以願
君景蕃之該洽則於東坡之意蓋庶幾可以無憾矣
游雖不能如至能所托而得序斯文豈非幸哉嘉泰
二年正月五日

蘇子由欒城集五十卷 後集二十四卷

第三集十卷 應詔集十二卷

轍字子由洵之次子也年十九中進士第二十舉直
言因所問極言得失策入或欲黜之仁宗不許擢商
州推官以兄得罪從坐謫筠州監酒宣仁臨朝相溫
公擢中書舍人代子瞻為翰林學士未幾拜尚書左
丞紹聖初責置雷州後北還凡居雷循七年居許十
六年杜門理舊學于是詩春秋傳老子解古史書皆
成自謂得聖賢遺意

陳氏曰欒城真定府縣也蘇氏望趙郡欒城元魏時
屬趙郡故云子由晚居潁上自號潁濱遺老故集或

名類濱

東坡曰子由之文實勝僕而世俗不知乃以為不如其為人深不願人知之其文如其為人故汪洋澹泊有一唱三嘆之聲而其秀傑之氣終不可沒作黃樓賦乃稍自振厲若欲以警發憤憤者而或者便謂僕代作此尤可笑是殆見吾善者機也

蘇文定公遺言二卷

周平園序略曰文定公晚居許昌避禍謝客罕與人言其聞緒論者子孫而止耳然諸子宦游惟長孫將作監丞籀年十有四才識卓然侍左右者九年記遺

言百餘條未嘗增損一語既老以授其子郎中君詡郎中復以授其子道州使君森予嘗與道州同僚故請題其後

龍川略志六卷 別志四卷

子由於元符二年夏居循州杜門閉目追惟平昔使其子遠書之紙凡四十事其秋復記四十七事龍川循州地名

三蘇年表三卷

陳氏曰右奉議郎孫汝聽撰汝聽當是蜀人所敘述甚詳

三蘇遺文

陸游跋曰此書蜀郡呂商隱周輔所編周輔入朝為史官得唐安守以歸未至家暴卒可悲也

蘇過斜川集二十卷

宋史初軾卒于常州過葬之汝州邾城小峨眉山遂家潁昌營湖陰水竹數畝名曰小斜川自號斜川居士且以名其集其思子賦颺風賦早行於時稱為小坡云

陳氏曰蘇過字叔黨坐黨家不得仕進終於通判中山府晁以道誌墓稱其純孝給事中嶠其孫也

九峰集四十卷

太常少卿眉山蘇元老在廷撰東坡從孫也坡在海
上常有書往來其罷奉常歸潁昌正坐元祐之黨未
幾卒年四十七

王子立文集

王適子立撰蘇子由之壻也潁濱序略曰適從予為
學長於詩騷予自南都謫居江南凡六年而歸未嘗
一日不相從也既與予同憂患至於涵泳圖史浮屠
老子之說亦未嘗不同之故聞道益深為文益高而
予觀之益久蓋其于兄弟妻子嚴而有恩和而有禮

未嘗有過故予嘗曰子非獨余親戚亦朋友也

李方叔集三十卷 濟南集二十集

李薦字方叔號月岩夾江人鄉貢進士東坡知貢舉得試卷以為方叔置之首選已而非也賦詩有平生謾說古戰場過眼還迷日五色之句後竟不第其母曰蘇公知舉而吾兒下第命也所著有師友聞見紀多子瞻淳夫之遺言

木雁居士集

鄭少微字明舉華陽人少孤力學登元祐進士第始就試禮部東坡知貢舉黃魯直與較藝得明舉由是

赫然古郛楊天惠三嵎李新皆以文名時人號為三儁按少微在宣和間上書言時政坐廢家貧無田宅栖成都金繩院十五年不變其守學益古文益工晚號本雁居士有集行於世德陽舊志載少微政和中知縣事云

楊天惠文集六十卷

通志云天惠郛縣人元豐進士後入黨籍按潼川志有楊天惠字祐甫登熙寧二年進士授雙流知縣多善政文詞得西京體即著彰明逸事及彭山十事記者不知同是一人否元豐熙寧年號亦相連

王君禮詩集

楊天惠曰成都王君禮自宕渠佐轉官資中嘗跨巴馬從一野僮徑造余門持刺大呼我王某也聞予名久特來耳因為具留之信宿而去其詩祖騷宗選出沒傳記為兒時已能賦有州里名晚年多出白語蘄曉流俗不以鑄珠為工

二江先生文集十六卷

元祐中雙流宋承之著南部馬涓序稱其筆端馭香落紙皆可諷詠在官惟以簡編筆研吟咏度日常曰世間樂孰與此吾將終身焉

三江集 太平讜議

達州王其昌著熙寧九年進士授黔江令元豐中景靈宮成其昌作賦獻之辭極雅麗

得得居士薏草一卷

陳氏曰右正言眉山任伯雨德翁撰其論章惇蔡卞欲廢宣仁尤切故卞深恨之獨貶嶺外按史高宗采其諫章追貶惇卞等明著誣宣仁事告天下詔贈伯雨官志云居諫省半年上一百八疏皆切國體

文與可丹淵集四十卷

文同字與可永泰人進士高第以文學名操韻高潔

畫筆尤妙仕至太常博士集賢校理元豐初出守吳興至宛丘驛忽留不行沐浴衣冠正坐而逝
東坡謂與可有四絕詩一楚詞二章草三畫四世少知者惟予一見識其妙處又有詩云斯人定何人游戲得自在詩鳴草聖餘兼入竹三昧他日觀其飛白復恨知與可之不盡也

費東平詩集六卷

文同序云嘉祐癸卯春東平先生以古律五七言詩共六帙因其甥朱景副書為示且屬余以序置其首余熟讀者累日甚愛之余居常數言唐人風調涉五

代衰季已淪委而不振及見先生所作信遺音餘響又浮大空至治世而復下今又軋然發于先生之筆舌爾按先生閩中人少舉進士自勝冠走四方游名公鉅卿之門命既不偶退返林壑盡諱其他能而一從事於此凡四十年深深摘幽愈老益工大抵氣和平而意精新使人嗜之而不厭也近世文士以篇什自名者甚衆如使先生之言雜行于其中彼將左右顧揖相推以為先余恐先生所得者固多傲然而獨居其前矣是可傳布於天下也此文見丹淵集未著名氏

無為子集四十卷

楊繪元素著漢州縣竹人也幼警敏讀書一過輒誦至老不忘為文立就皇祐初擢進士第二仕天章閣待制知杭州嘗居無為山號無為子云

李公敏集

李誼伯字公敏綿州人皇祐五年進士幼孝謹長通六經歷威邛果漢四郡守贈金紫光祿大夫有詩賦三十卷雜文二十卷其子孟侯通直郎仲侯司理叅軍政績見神道碑銘

願堂集

宋王灼字晦叔號願堂遂寧人文詞古雅隱居不仕復著有碧鷄漫志十卷糖霜譜一卷

鮮洪範長江詩集

山谷跋云余昔聞蜀人有魯三江者號稱能詩士大夫多宗之今觀閬州鮮長江詩不甚愧之也雖切磋琢磨之功少而渾厚之氣幾度其前矣昔方士袁天綱見閬州錦屏山題其石曰此山磨滅英靈乃絕然予在中朝唯聞陳文忠公家世出才士嘗疑山水之秀豈獨鍾於陳氏耶其沉淪草萊困頓州縣抱才器而與麋鹿共盡者可勝道哉今觀鮮長江之才所謂

困頓州縣者也使之學不盡其才名不聞於世亦其鄉之先達士大夫之罪也蓋道不明於天下則士不知擇術道不行於天下則民之毀譽不公豈獨士大夫之罪哉其所從來遠矣鮮氏唯以閬中為族姓其散漫於兩蜀者皆以閬中為祖今試問鮮氏所自出皆不能自言或云出於鮮于後去于而為鮮以余考之非是蜀李壽時司徒鮮明用事專廢立其鮮氏之祖歟

鮮于諫議集三卷

鮮于侁字子駿閬中人景祐初登進士乙科仕至諫議大夫侁治經術論著多出新意晚年為詩與楚詞尤精志稱子駿有詩傳六十卷

東坡曰鮮于子駿九誦友屈宋于千載上堯祠舜祠二章氣格高古東漢以來鮮及也

張無盡集三十二卷

張商英字天覺登第調官峽路章惇察訪巴蜀風采傾動西南峽中部使者憂之因求辯博之士以備燕談或以天覺姓名告檄召至夔州惇杯酒間果以人材為問部使者即言之惇令召入天覺不冠服峨巾長揖徑就坐左惇負氣敢大言天覺輒吐詞壓之惇

大喜歸而薦于朝由是召用元祐中為開封府推官
出使河東紹聖初擢御史大觀四年長星見蔡京罷
相乃拜右僕射盡反京之政召用元祐遷客天下翕
然歸重耆年去位靖康初遂與司馬溫公范文正公
同日降制加贈官爵賜謚文忠

黃松子集十卷

唐安張唐英次公著商英之兄也進士及第殿中侍
御史

蒲左丞集十卷

蒲宗孟字傳正閬州新井人皇祐五年進士曾公亮

薦除館職神宗謂宰相曰宗孟有史才乃召同脩國
史入為翰林學士除尚書左丞卒年六十六

宋史宗孟累遷翰林學士兼侍讀舊制學士唯服金
帶宗孟入謝神宗曰學士職清地近非他官比而官
儀未寵迺加佩魚遂著為令宗孟趣尚嚴整而性侈
汰藏帑豐每旦割羊十豕十然燭三百入郡舍或請
損之愠曰君欲使我坐暗室忍饑邪常日盥潔有小
洗面大洗面小濯足大濯足之別每用婢十數人一
浴至湯五斛他奉養率稱是嘗以書抵蘇軾云晚年
學道有所得軾答曰聞所得甚高然有二事相勸一

曰慈二曰儉蓋鍼其失也

唐子西集十卷

唐庚字子西眉山人登進士第早受知於張天覺天覺為相擢京畿提舉欲用為諫官會天覺去位貶惠州

鴈湖李氏曰唐子西文采風流人

東坡

遯菴集

丹稜唐文若著子西之子

一江集三卷

鄧至著雙流人綰之父也通六經學者從之甚衆每

出入里中里中人皆拱立其尊敬之如此

廬江集七十卷 治道中術六卷十三篇

南充何涉濟川著涉於六經百家山經地志醫卜之書無不讀景祐進士司封員外郎所著有春秋本旨雖在軍中嘗為諸將講左氏春秋狄青之徒橫經以聽司馬溫公嘗言學者讀書少能自首卷讀至卷末往往或從中或從末隨意讀起又多不能終篇光性最專猶患如此從來惟見何涉學士案上惟置一書讀之自首至尾正錯校字以至終篇未終誓不他讀此學者所難也

邊臣要略二十卷 平戎策十五篇

普州景秦周卿著進士起家歷尚書屯田員外郎忠
州刺史有識鑒教二子相繼死王事



